

Sþ.

225. Tillaga til þingsályktunar

um ríkisábyrgð fyrir rafveituláni Eyrarsveitar á Snæfellsnesi.

Flm.: Gunnar Thoroddsen.

Alpingi ályktar að heimila ríkisstjórninni að ábyrgjast fyrir hönd ríkissjóðs 50 þús. kr. lán Eyrarsveitar í Snæfellsnessýslu til rafveitusframkvæmda, þó ekki yfir 85% af stofnkostnaði.

G r e i n a r g e r ð.

I Grafarnesi við Grundarfjörð hefur á örfáum árum risið upp kauptún með tveim hundruðum íbúa. Hraðfrystihús starfar þar og verzlanir, og útvegur er rekinn þaðan. Kauptúnið er einstakt í sinni röð á landi hér að því leyti, sem það er byggt frá upphafi samkvæmt fyrirfram gerðum skipulagsupprætti. Kauptúnið liggur mæta vel við fiskimiðum og hafnarskilyrði eru þar ágæt.

Með hinum öra vexti og mikla atvinnurekstri er óhjákvæmilegt að afla kauptúninu rafmagns þegar í stað. Hafa verið fest kaup á vélasamstæðu (mótor) í þessu skyni og búið að setja hana upp. Næst er að leggja rafleiðslur um kauptúnið.

Tillaga þessi fer fram á ríkisábyrgð fyrir 50 þús. kr. láni í þessu skyni, þó ekki yfir 85% stofnkostnaðar.